

Ovdasátni

Dát Sámi diedalaš áigečállaga nummar lea ávvočála Ole Heandarakhii, professor Ole Henrik Magga 60-jagi beaivái. Mun beasange cealkit dán ovdasáni Ole Heandaraga hoavdan ja bargoustibin. Dáinna ávvočállagiin mii háliidit gudnejahttit Ole Heandaraga, go mun diedán ahte son nu áinnas ánsšáa ávvuduvvot maiddái sámi máilmmis sámegillii daid viiddis bargguid ja doaimmaid dihtii maid son lea bargan sihke fágalaččat ja politihkalaččat sámiide – ja eará eamiálbmogiidda ávkin.

Ole Heandarát lea jo ovdalaččas beakkálmas ja dovddus. Su namma lea čuodjan čáppa šuoŋaiguin ja sániiguin sihke Davviriikkain, Sámis ja maiddái eará eamiálbmotguovlluin máilmmis.

Ja nuhan leage Ole Heandarát, álo mojonjálmmiid lea vuostáiváldán sihke ovttaskas studeantta ságastallamii ja alla hearráid ja gonagasaid iežas politihkalaš eallimis. Son leage dakkár olmmoš gii gulahallá ja láchčá gulahallandilálašvuođa, son nákke sihke juonaiguin ja suonaiguin rahpat uvssaid ja čohkket olbmuid vel dakkár diliinge main buohkat earát leat vuollánan.

Mii geat leat beassan dovdat Ole Heandaraga ja ovttasbargat suinna sáme-gielfága siskkobealde, diehtit man árjjalaš ja čeahppi son lea; sus sáhtá jerrat fágalaš gažaldagaid ja son máhtá čilget daid váddásamos čuolmmaid nu bures ahte olmmoš movttáska ja nu duostá iešge joatkit fágalaš barggu ain ovddosguvlui. Sámegeilla leage sutnje váimmu ášši ja fágalaččat lea son dasa maid bidjan vuođu, vuosttažettiin čállinvuogi barggu oktavuodas.

Ole Heandarát lea olmmoš gii hálddaša olu arenaid dán máilmmis. Son hállá olu gielaid ja gulahallá sihke oahppásiiguin ja apmasiiguin. Árbevirolaš sámi eallinvuogi dovda son erenoamáš bures, ovdamearkka dihtii lea luohiti lunddolaš oassi su eallimis, ja lean lihkus maid beassan gullat su juoigamin olu oktavuodain, ii báljo boađe olmmoš dahje duovdda ovddal man luohi son ii máhte... Danin bođiige dát luohiti munnje čáledettiin dán ovdasáni:

Jáhkkoš gii jáhkka ja gullos gii gullá, muhto nu dat lea:

*Lei jo loi, le loi lá, loi, lá loi lá-loi, lá lei jo loi, le loi lá, loi, lá loi lá-loi, lá
Ja leage Ole Heandarát jo loi, lá, loi, lá -lei jo loi, le loi lá, loi, lá loi lá-loi, lá.
Viiddis jurdagat ja viiddis juonat loi, lá- lei jo loi, le loi lá, loi, ál, loi lá-loi, lá.
Ja viiddis eatnamiid jo rasttildii go, loi, lá lei jo loi, le loi lá, loi, lá loi lá-loi, lá
Ja viidát gulahalai son maid jo go loi lá- lei jo loi, le loi lá, loi, lá loi lá-loi, lá
Ja ii leat gullon jogo oba Sámis dakkár olmmái lei jo loi, le loi lá, loi, lá loi lá
Ja iige oba máilmmis jogo dakkár olmmái loi, lá- lei jo loi, le loi lá, loi, lá loi lá-loi, lá
Ole Henrik Magga han jo leage - loi, lá, - lei jo loi, le loi lá, loi, lá loi lá-loi, lá
Iige dušše okta luohiti leat sus loi, lá- lei jo loi, le loi lá, loi, lá loi lá-loi, lá
Professora XHM han leage luohiti loi, lá. - lei jo loi, le loi lá, loi, lá loi lá-loi, lá
Lei jo loi, le loi lá, loi, lá loi lá-loi-lá- lei jo loi, le loi lá, loi, lá loi lá-loi, lá...*

Ja nu leage luođi luondu, dajahusat čuvvot luođi nuohta dego luovddit
nuohti čázis, muhto das ii leat álgu iige loahppa...

Mun háliidan dasto giitit buohkaid geat leat bargan ávvočállagiin, vuostta-
žettiin artihkalčálliid, dasto ávvočállaga bargajoavkku: prorektor Kristine
Nystad, vuosttasamanuensa Nils Øivind Helander, dutki Káren Elle Gaup ja
prošeaktakonsuleanta Ellen Brita Eira. Maiddái háliidan giitit Sámi dieđalaš
áigečállaga doaimmahusgotti mas čuovvovaš olbmot leat leamašan fárus:
vældodoaimmaheaddji Jelena Porsanger ja doaimmahusgotti lahtut Johanna
Ijäs, Nils Oskal ja Regnor Jernsletten ja doaimmahusčalli Berit Merete
Nystad Eskonsipo. Giittán maiddái Ole Heandaraga lagas olbmuid, su eami-
da Lájllá, vieljaid ja mánáid dieđuid ja govaid ovddas.

Sávan Ole Heandarahkii lihku 60-jagi beivviin oba váimmustan ja mielas-
tan!

Guovdageainnus cuoŋománus 2007

*Sámi allaskuvlla rektor
Mai Britt Utsi*